



UKA 2025/12 – UKA 2025/72 – UKA 2025/127

11/11-2025

Margrethe Thårup Andersen

Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaata allanngortinneqarneranik Inatsisartut inatsisissaattut siunnersuut
(Aningaasaqarnermut Akileraartarnermullu Naalakkersuisoq)
(Siullermeerineq)

Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaata nr. 21, 28. november 2016-imeersup atorunnaarsinneqarnissaa pillugu siunnersuummik, kingusinnerpaamik UKA2026-mi, saqqummiussinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Pele Broberg, Naleraq)
(Siullermeerineq)

Soraarnerussutisiassanut pinngitsaaliissummik katersisussaaitaanerup eqqunneqareerneranik inuiaqatigiinni annertuumik eqqornerlungaasoqartarnerata naalakkersuinikkut qanoq aaqqiivigineqarsinnaanera pillugu apeqquteqaat aallaavingalugu oqallisissiatut siunnersuut.
(Inatsisartunut ilaasortaq, Aqqalu C. Jerimiassen, Atassut)

Apeqquteqaatinut, soraarnerussutisiaqarnissamut aaqqissuussinermut pinngitsoorani ilaanissaq pillugu Demokraatit politikkiannik saqqummiussinissannut periarfissiisunut qujanaq.

Eqqaamassavarput aaqqissuussineq 2016-imi partiinit tamanit akuersissutigineqarmat. Taamani siunertaasoq pitsaasimaqaaq, pitsaallunilu; ataqqineqartumik, toqqissisimanartumillu utoqqaasinnaanissaq tunngaviusumik siunertaavoq.

Aaqqiissut siunertamisut ingerlanngitsoq, maanilu arlalinnut annertuumik pakatsinermik pilersitsisimasoq ajoraluartumik paasinarsisimavoq.

Tamanna tunuliaqutaralugu aaqqiineq massakkut taamatut isikkoqartillugu atorunnaarsinneqarnissaa kissaatigalugu, ukiuni arlaqartuni Demokraatit ersarissumik politikkerat. Tamanna isertuutinngisaannarparput. Tunngaviusumik isumaqarpugut, innuttaasut utoqqalinissaminnut qanoq ileqqaagaqarniarnerlutik namminneerlutik aalajangersinnaasariaqaraat. Inunnut ataasiakkaanut kiffaanngissuseqartitsinissamut, akisussaaffeqartitsinissamut, ataqqinninnissamullu tunngassuteqarpoq.

Taamaattumillu taakkua oqaatigereerlugit soraarnerussutisiaqarnermut tunngasoq tamarmi ataatsimut, peqqissaarutamillu misissorneqartariaqartoq aamma ilisimaararput. Tamakkiisumik aaqqiissutaanatik, ajornartorsiutinut aaqqiissutaagallaannartut tapersersornianngilagut. Tamanna pillugu isumaqarpugut,



soraarnerussutisiaqarnermut tunngasoq tamarmi qanoq aaqqissuunneqarnissaanut, siunissamullu qanoq qulakkeerneqarnissaanik ilisimatuut innersuussuteqarnissaat siunertaralugu suliaq Naalakkersuisunit aallartinneqarsimasoq tapersersussallugu isumatusaarnerusoq. Uani aamma soraarnerussutisiaqarnissamut aaqqissuussinermut pinngitsoorani ilaanissamut tunngatillugu.

Massakkut inatsisaasumi kukkunerit ersarilluinnartut, naleqqutinngitsullu maannangaaq iliuuseqarfigniarneqarmata naammagisimaarparput. Ileqqaagaqarnissamut piumasaqaataasumik naammassinissinnaanngitsut procentimik qaffasinnersumik immi akileraartussanngortinneqartarnerat naleqqutinngilaq. Aningaasaqarnikkut ilungersoreersut qaavatigut ilungersortinneqartarput, systemimullu tatiginninneq aserorneqartarluni. Tamanna pillugu suleriaatsip taassumap atorunnaarsinneqarnissaa naleqqullunilu pisariaqarpoq.

Tjenestemandinut soraarnerussutisiat pillugit ajornartorsiutaasoq aaqqinneqassammat aamma pitsaavoq. Akissarsiaq ataaseq pineqartillugu assigiinngitsuni ileqqaagaqarnissamut kinaluunniit pinngitsaalineqassanngilaq. Ilisimasallit suliaasaat utaqqineqarani, naapertuilluannginneq tamanna aamma erngertumik iluarsineqassaaq.

Ilisimasallit sulinerini ileqqaagaqarnissamut procenti nikittussaajunnaarsinneqartoq, taamaalilluni toqqissiallatsitsisoqartoq maluginiarparput. Tamanna tapersersugassaqqippoq, tamannalu aamma tapersersorparput.

Suliap ingerlateqqinnerani soraarnerussutisianut systemimik paasiuminartumik, piujuartussamik, innuttaasunullu naapertuilluartumik, ilutigisaanillu siunertagissaartumik qanoq pilersitsisinnaanerluta misissussallugu pingaaruteqarpoq.

Tassunga atatillugu innuttaasut isumaqatigiissutitik aqqutigalugit soraarnerussutisiaqarnissamut aaqqiissuteqanngitsut ileqqaagarnissaat qulakkiissallugu, soraarnerussutisiaqarnissamut aaqqissuussinermut pinngitsoorani ilaanissap siunertarisimammagu eqqaamassavarput. Kingorna taakkua pineqartut akiliuteqartussaajunnaarsinneqarput, taamaalillunilu aaqqiissutip siunertaa millisinneqarluni. Siunertaq malillugu ingerlajunnaarsimasoq, systemilu tamarmi tunngaviusumik nutaamik eqqarsaatigineqartariaqartoq paasinarsivoq.

Tamanna pillugu soraarnerussutisiaqarnissamut aaqqissuussinermut pinngitsoorani ilaanissap massakkut taamatut isikkoqartillugu atorunnaarsinneqarnissaanik Demokraatit kissaatertik attatiinnarpaat, taamaattumik kingunissai aamma periarfissat tamakkiisumik takusinnaaniassagatsigit tamanna paasinarsakkamik, akisussaassusilimmillu pissasoq kissaatigaarput.

Tamanna tunuliaqutaralugu immikkoortoq 12-imi Naalakkersuisut allannguutissatut siunnersuutigisaat tapersersorpagut. Allannguutit taakkua ersarilluinnarnerpaamik kukkunernut iluarsiissapput. Taassumap saniatigut soraarnerussutisiaqarnissamut systemimik patajaatsumik, siunissamullu qulakkiikkamik



pilersitsinissaq pillugu partiinik tamanik suleqateqarniassagatta, ilisimasallit suliaminnik saqqummiussinissaat qilanaaraarput. Inuup, inuiaqatigiillu pisariaqartitaat ataqqinneqarlutik ataatsimoortumik aaqqiissutissaq qilanaaraarput.

Taamatut oqaaseqarlunga immikkoortup 12-ip aappassaaneerneqannginnerani Aningaasaqarnermut Akileraartarnermullu Ataatsimiititaliami oqaluuserineqaqqissasoq inassutigineqarpoq. Immikkoortoq 72 itigartitsissutigineqassasoq inassutigineqarpoq.